



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Nigeria nung pua bener or aliba
tanur 100 meypa anir aruogo

Son blackmail asüba tetsür
ka tepuokdaki yok



VOL. XXIII ISSUE NO. 63 (ADOK 63) DIMAPUR SANGTENNÜ (TUESDAY) LUCHII (DECEMBER) 09, 2025

₹ 5.00

Kohima nung Hornbill esports Festival tenzükogo

Kohima, December 8, 2025 (TYO): Hombarnü Indira Gandhi Stadium, Kohima nung Hornbill Esports Festival 2025 tenzükogo aser iba ya Nagaland nung tanabenbuba ayonga agir.

Iba sentong ya Esports Association of Nagaland (ESAN)-i Department of Youth Resources and Sports den yaritepa ayongzüker. Iba sentong ya esports talent ajungketba den music, youth culture aser digital entertainment den gaming sendakteptsü nükjidong nung ayonga agir.

"Department-i global youth engagement wadang renlokdaiksüba mapa inyakba atema tenüngsang agütsür" ta Advisor to the Chief Minister, IDAN Chairman aser Athletics Federation of India (AFI) Vice President Abu Metha-i ashi.

"Yaküm Union Minister for Youth Affairs and Sports ajanga semdangdang Nagaland dak temulung kanga süa liasü. Tanga Northeastern state tem ama masü sorkari esports sentongtem pusema ayongzüka atema pa kanga pela" ta Metha-i ashi.

"eSports ya tanü putu nung adokba sentong ka lir aser iba indang billion-dollar industry lir. Nagaland nung lanurtemi kanga kara ainba global sector nung maongkatem magii meyutsünür" ta pai ashi.

eSports indang international championships nung multi-million-dollar prize pools agütsür aser Naga nunger asayar kati tawa tu Khelo India Esports Championships nung football segment nung takok ngua liasü, ta Abu Metha-isa ashi.

"Esports ya entertainment dang masü saka pei taküm liyonga aotsü wadang ka lir. Alima tesem balala nung players, creators aser developers iba ajanga dang alir. esports ajanga

mainstream sports training nungiter aser alima nung academy aikati football aser basketball simulation games ajanga tesayuba balala agütsür" ta pai ashi.

Iba sentong nung national-level rounds ajanger nisung 300 pelashishia agizüker. Nagaland-i aruba asayar shia "champion" ka lir ta Metha-isa shisem.

"Nagaland sorkari facilities tajungba agütsütsü tenangzüka lir aser tang infrastructure tsütsü timtem aliba atema tatok meshir" ta paisa metetdaiksü.

"Tarutsü nung Nagaland ya national dang masü international jenjang nung esports indang centre ka akümtsü" ta Abu Metha-isa ashi.

YRS Director Kethosituo Sekhose-i taküm championship nung telemsa balala indang metetdaiksü.

BGMI (Battlegrounds Mobile India)- Nagaland nungi telok ka, Manipur nungi pezü, Assam nungi tenet, Bihar nungi ka, Mizoram nungi ka aser West Bengal ana sentep ajak agi telok 16-i shilem agitsü.

Moba Legends 5v5 nung Nagaland nungi telok 8, Arunachal Pradesh, West Bengal, Manipur aser Kerala nungi kaka aser Assam nungi ana lir. Iba atema prize pool ji Rs 3,00,000 aser Rs 1,00,000 jenjang Diamonds lir.

E-Chess nung asayar 11 lir aser prize pool Rs 75,000 lir. E-Football nung asayar 14 aser prize pool Rs 1,00,000 lir. Maneni, FC 25 nung registered players 60 aser prize pool Rs 75,000 lir.

The championship will conclude Tuesday.

Khelo India Youth Games nung mezüng atema esports benoka asayadang Nagaland athlete kati E-Football nung gold angu ta Sekhose-i metetdaiksü.

Unity Plaza nung Cultural Show kanga junga agiogo

Dimapur, December 8, 2025 (TYO): Hornbill Festival 2025 tenzüker anogo tibuba amungdang Unity Plaza nung Cultural Show kanga junga agiogo.

Iba sentong nung Rural Development & SIRD Minister Metsubo Jamir host aser Tribal Affairs & Election Advisor H. Tovihoto Ayemi co-host liasü.

Sentong nung tongti tesemdang Minister of State for Communication and Rural Development Dr. Pemmasani Chandra Sekhar aser tetushi süa jaoker Secretary, Ministry of DoNER Chanchal Kumar, IAS na aden. Tena dak alia M. Ragja Murugan, IPS, Managing Director, & U.J. Chamargore, Director (Technical)-II, NHIDCL den tongti ketdangsürtem aden.

Cultural Show nung Lotha troupe-i Chumpo Shar,

Chakhesang troupe-i Pheta, Konyak troupe-i Ya-ai Boa, Yimkhiung Cultural Troupe-i lolong pe (Traditional Go-Cart) aser Kuki troupe-i Vakol Lam ia sayu.

Parnok sülen Zeliang troupe-i Chakhiu Lui, Khiamniungan troupe-i Shiekou, Garo troupe-i Gando Makkal Pala, Chang troupe-i Shangbili Chia, Kachari troupe-i Laijam Bonai aser Angami Cultural Troupe-i Tholi Keva (Indigenous dice game) ia sayua liasü.

Tatamsa, Ao troupe-i Azütu, Tikhir troupe-i Tshahyok Tsin, Phom troupe-i Yangja Khümpo, Rengma troupe-i Sohnnnyu, Sangtam troupe-i Lungchung Kingmilitaba aser Sumi troupe concluded with Angushu Kighikile ia sentong tembanga liasü.

Dr. Sekhar-i sobaliba, tesentaktep aser tzü wazüka ayutsü ayongzüker



Union Minister of State for Rural Development and Communications, Dr. Pemmasani Chandra Sekhar-i Watershed Mahotsav 2025 atema State Level Launching Program nung jembidang agiba noksa angur. (Kohima, December 8)

Kohima, December 8, 2025 (TYO): Sobaliba, tesentaktep aser tzü wazüka ayuba ajanga asen linük tarutsü yangertsü ta Union Minister of State for Rural Development and Communications, Dr. Pemmasani Chandra Sekhar-i ashi.

Naga Solidarity Park nung Hombarnü Watershed Mahotsav indang Nagaland State-Level Launching Programme nung Dr. Sekhar-i iba osang metetdaiksü.

"Centre sorkari Northeast atema temulung kanga agütsür aser Modi sorkar marudang Northeast ya frontier ka ama dang züngshi. India renlokba otsü nung Modi-i Northeast dendaktsü" ta pai ashi.

Northeast nung railways, highways aser digital connectivity tajungba akümba ajanga agriculture, tourism aser employment nung maongka tasentem angur ta paisa shisem.

"Nagaland nung cobalt, crude oil, spices anguba aser English oshi jembiba ajanga lenmanga aika lapoktsür. Prime Minister Narendra Modi'er mangdang ajanga item ya jangjatetogo aser ajungketer" ta Dr. Sekhar-isa metetdaiksü.

Iba tetushi ya temulungjang taroktiba nungi adoker aser ni Telugu Desam Party nungi NDA

nung minister ka lir ta paisa ashi.

Tanü water security ya national security den kasa dang lir. India nung tzü ajema akümer aser "water-stressed" category nung lir. Anungji asenoki tzü jungjunga wazüka meyura tzümetsüng aser tzüngsarusaaba tamajungba akümtsü aser ali anenzüka aoba khuret tuluba akümtsü ta Dr. Sekhar-i ashi.

"PM Krishi Sanchay Vajra (PMKSY) kübok watershed development ajanga tajangzüker nguogo aser aluyimertem income 70%, milk production 40% agi teimba kümogo aser groundwater levels asemlen agi tajungba kümogo" ta paisa metetdaiksü.

PMKSY 2.0 kübok Rs 1,200 crore alanga mapatong 1,200 tashi linük kübok tesem balala nung inyaker ta paisa shisem.

Centre-i Northeast asoshi funding pattern balaka agütsür aser mapatong nung 90% tashi India sorkari agütsür. Tanga state tem nembo 60% dang agütsür anungji state sorkar aser nübortemi iba teyari agitsüla ta Dr. Sekhar-isa metetdaiksü.

"Nagaland nung Rs 140 crore alang watershed projects 14 inyaktsü mulunga agizükogo aser Centre-i Rs 80 crore agüjadokogo. State sorkari water harvesting structures 555

yanglushiba aser natural springs 120 tashi anepaluba ajanga aluyimer 6,500 nem tajangzüker agütsüogo aser iba atema tetushi agütsür" ta paisa shisem.

Taruba phase nung Punarudan adentsü aser iba nung water bodies tejentem yanglushitsü, walking tracks yanglutsü, fishery aser eco-friendly plantations ajungmesotsü aser sustainable revenue generation adokdaiksütsü. MGNREGA amala scheme tem ajanga teyari balala agütsütsü ta paisa shisem.

"Ni Deobar nikongdang Nagaland tonga aru aser Hornbill Festival semdangogo. Iba benjung ya Nagaland indang 'heartbeat' lir aser nisung temeyoktep aliba India nung telongjem indang maitüsü lir" ta Dr. Sekhar-i ashi.

"India nung sobaliba inyaksangshi aika samaa aoer saka Hornbill Festival ajanga tanü putu nung senmang wazüka ayutsü milendong ka ama len ania sayur. Naga nunger lanurtem tangatetba tushir kechiyong nenok music aser sempet alimai ajitet" ta paisa metetdaiksü.

Watershed Mahotsav 2025 nung Department of Land Resources Advisor G. Ikuto Zhimomi-i host ama shilem agi.

NFHRCC-i sorkar dang tamasa Foothills Road yanglutsü nenshir

Dimapur, December 8, 2025 (TYO): Nagaland Foothills Road Coordination Committee (NFHRCC)-i kin hohotem den asüngdangtepba sülen state sorkar dang tanga mapa inyaka maodang tamasa Tizit nungi Khelma tashi 2 Lane Foothills Road yanglutsü nenshiogo.

SASCI loan component kübok Phase 2 Project ya tanüngba Division ajak nung Open Tender system ajanga agütsütsüla ta parnokisa ashi.

Baghty Division nung Double Lane Solid Galvanized Steel

Bridges 5 aser Doyang Bridge Governor's Camp, Liphanyan nungi Merapani Village Foothills point tashi lenmang yangluba DPR nung tim masüba meteta kanga aoksar ta Media Cell, NFHRCC-i sangdong ka nung ashi.

Kilometre 41 lenmang piyong nung embankment, side walls aser retaining walls kecha mali aser joint inspection asüadang department ketdangsürtemi iba atema osang tejangja magütsüteter. Talisa iba tesem nung mapa inyakba kanga

mapang agir anungji December 5, 2025 nü NFHRCC-i Lotha Hoho aser LLRPO, YAPO ama parnok kübok teloktemi bangdak contractors aser Department Divisional ketdangsürtem den senden ka ayonga amentsü mapa nungloktsüogo ta Media Cell sangdong nungsa shia lir.

NPWD, Road & Bridges ajanga Baghty Division nung mapa inyaker nübo peria agütsütsü kechiyong iba tesem nung field staff peria maliba ajitetogo ta NFHRCC-isa metetdaiksüogo.

Nagaland Digital Entrepreneurship & Startup Fest ayongzük



National Institute of Electronics & Information Technology (NIELIT) Kohima nung December 8, 2025 nü Nagaland Digital Entrepreneurship & Startup Fest agidang tangokba noksa ka yangi angur.

Dimapur, Luchii/December 08 (TYO): National Institute of Electronics & Information Technology (NIELIT) Kohima aser Department of Information Technology & Communication lungjemer ayongzükba Nagaland Digital Entrepreneurship & Startup Fest sentong December 8, 2025 nü NIELIT, Kohima nung agia liasü.

Sentong akhumdong Secretary, Ministry of Electronics & Information Technology (MeitY), S. Krishnan, IAS ajanga jembidang, pai Nagaland mezüngbuba semdangba mapang ajangshibatam lemsatepdang Kisama nung Hornbill Festival aser World War II Museum nung semdanga Kohima War Cemetery nung asür nem akhum agütsüba indang ashi.

Lenla ajunga nung rongsenketzüng ainba anasü agi tali digital economy ulushia akumer aser 2010 matongdang linük economy shilem 6-7 shi digital economy liasü aser 2014 tashinung anasü agi tali akum aser 2023 tashinung shilem 20 atongtsü imlar, ta Krishnan-i ashi.

Naga nung lanurtem dak sempet peria aliba, talisa English oshi junga meteta aliba indang pai lemsatep aser NIELITE ama reju temi item sempet tajungba kumdaktsür ta ashi.

India nung NIELIT centers 55 aliba nungi Northeast nung 20 lir, ta Secretary, MeitY ajanga

ashi.

Cyber security indang jembidang, iba tongtipang tesem nung India-i bendanger indang technologies nung metaloka alila masü, ta pai ashi. NIELIT Kohima nung aliba Cyber Security Lab ya state-of-the-art lir aser linük nung tajungtiba rongnung dena lir, koba ajanga cyber policing nung tongtipang shilem agir, ta Krishnan-i ashi. Tawa New Delhi nung AI sentong agidang NIELIT Kohima aser NIELIT Mokokchungungi shilem tajung agiba atema pai pelaba lemsatepa liasü.

Entrepreneurship nung temulung agütsütsü tongtipang lir aser mapa agütsüba nung startups temi tongti shilem agir, ta pai ashi aser region nungi startups aser collaborations tali adoktsü imlaba lemsatepa liasü.

Paisa Software Technology Parks of India (STPI) Kohima inyakyim nung temulung asüba lemsatep aser STPI Kohima nung tesem mesümenangba ajanga Software Park ka amenoktsü asoshi lenmang bushinung ajungtsü ta shisa agütsü.

Iba sentong nung Krishnan ajanga Digital Learning and Simulation Hub, Digital Delivery of Statutory Service initiative aser Pulse App (AI tashi amshiba news platform) semzükja liasü. Kasa mapang Conference Report of NCCDFI

2025 sayaa liasü.

Sentong nung Krishnan-i Nagaland Digital Startup Awards 2025 takok angur nem sempet agüja liasü. Iba nung Ahibi ajanga Best Seed Stage Startup sempet angur, Kikonik Tech ajanga Most Innovative Early Stage Product award for Pikonik angur.

JoldiPabo nem Outstanding Bootstrapped Success sempet agüja liasü.

Innovative Startup (Non-Tech) category nung tematiba sempet 87T Entertainment nem agüja liasü.

Kasa sentong nung Commissioner & Secretary, P&AR and Power, Mohammed Ali Shihab, IAS ajanga jembidang, S. Krishnan nem tenüngsang agütsü aser Nagaland ya developmental phase alema ogo aser NIELIT ama institutions balala den teka amteper terenlok mapa inyaker ta ashi.

Iba sentong nung Director, NIELIT Kohima, L. Lanuwabang-i pela agizükba o jembida aser Director, Department of IT&C, Sabou Yashu-i melepzüng o jembiba liasü, kong Chairman, Job Reservation Commission, R. Ramakrishnan, IAS (Retd.); Director General & Vice Chancellor of NIELIT, Prof. (Dr.) Madan Mohan Tripathi; sorkar ketdangsur aser institutions balala nungi kaketshirtem dena liasü.

Niuland nung DWSM senden amen



Dimapur, Luchii/December 08 (TYO): Deputy Commissioner & Chairman, District Water and Sanitation Mission (DWSM) Niuland, Sara S Jamir ajanga DWSM senden ka December 8, 2025 nü Deputy Commissioner, Niuland indang Conference Hall nung

ayongzükba liasü.

Iba senden nung Executive Engineer PHED, Nirie-e Nisa-i "HAMARA SHAUCHALAY- HAMARA BHAVISHYA" (Our Toilet our future) indang nükjidong lemsatepa liasü.

DC Niuland, Sara S Jamir-i

Hovishe aser Viyito village atema Jal Jeevan Mission & Swachh Bharat Mission Gramin phase 2.0 repringhia liasü.

Kasa mapang DC Niuland-isa DC indang office nung yanglua aliba metzü meshiba tesem tasenba World Toilet Day tenüng nung semzükja liasü.

Tanü NSCN/GPRN-R (Akato) 'National Political Meet' alitsü

Dimapur, Luchii/December 08 (TYO): NSCN/GPRN - R (Akato) indang general 'National Political Meet' December 9, 2025 nü Hoito Village nung anüngdang 12:00 ako shidak nung alitsü, ta

NSCN/GPRN - R (Akato) sangdong ka ajanga ashi.

Anungji züngsem ajak iba senden nung adentsü metetdaksür, ta sangdong ajangasa ashi.

Civil Defence Training phase tanabuba Kohima nung tenzüktsü

Dimapur, Luchii/December 08 (TYO): Wardens aser Volunteers atema Civil Defence Training phase tanabuba December 12-18, 2025 anogotem agitsü, ta Office of the District Commandant, Home Guards, Civil Defence & SDRF, Kohima ajanga sangdong ka nung metetdaksü.

Director General, Home Guards, Civil Defence & SDRF, Nagaland ajanga totuyuba agütsüba ama iba training ya ayongzükur.

Ward No. 8 aser Ward No. 19 kübok Wardens aser Volunteers tem Old Agriculture Directorate, AG Colony, Kohima nung aliba District Commandant's Office bushia December 12, 2025 anepdang 9:30 ako nung arutsü metetdaksür, ta ashi.

Shilem agitsüpur temi passport-size noksa ana-na aser Aadhaar card copy ka-ka bener arutsüla, ta Wopenthung Kikon, District Commandant, Kohima ajanga sangdong nung metetdaksü.

Nagaland CineFest 2025 sentong tembangogo



Advisor to Chief Minister and Chairman, IDAN, Abu Metha aser Director IPR, Dzüvinuo Theünuo den Dreamz Unlimited team noksa nung angur.

Dimapur, Luchii/December 08 (TYO): Asemnü Nagaland CineFest 2025 sentong December 8, 2025 nü tembangogo, kong master classes, sensaksem aser film screenings liasü.

Nagaland CineFest 2025 tembangba sentong akhumdong Advisor to Chief Minister and Chairman, IDAN, Abu Metha liasü.

Iba sentong nung jembidang, Department of Information & Public Relations ajanga Nagaland CineFest 2025 ayongzükba atema tenüngsang agütsü aser Department-i mapa tajung jenti inyakba asoshi pelaba lemsatepa liasü.

Metha-i Nagaland nungi otsü tem alima nem metetdaksütsü nüngdaker ta ashi aser asen tejangraba, aseni akhumtsübo asoshi ayimtenba, yimjung asoshi ola adokba ya azüdokshi yimya ajanga masü saka otsü, kaket, films aser contents ajanga lemsateptsüla, ta ashi.

Dreamz Unlimited team-i Nagaland film industry nung shilem agiba aser Nagaland aser yangji aliba nüburtem atema ambassador tajung ka ama aliba asoshia pai tetushi agüja liasü.

Pai sapang balala nung artists aser innovators tem dang Nagaland aser yangi aliba takum yimya indang otsü ashitsü aser parnok mapa ajanga Nagaland indang sayutsü ayongzükba liasü.

Metha-i social media aser modern information technology nung tashi aitba indang lemsatep aser item hadir kanga kumdanga amshitsü ayongzükba liasü.

Paisa iba sentong ayonger dang Nagaland CineFest ya national aser alima ajungai metetba sentong ka kumdaktsütsü asoshi

meranga inyaktsü, otsü ashir aser film yanglur nem maongka tali agütsütsü ayongzükba liasü.

Director IPR, Dzüvinuo Theünuo-i pela agizükba o jembidang Department-i Nagaland CineFest 2025 ayongzükba atema pelaba lemsatep aser Ministry of Information & Broadcasting, Government of India kübok National Film Development Corporation (NFDC) ajanga yariba atema tenüngsang agüja liasü.

Lai asemnü sentong tongmelang agi lemsatepa liasü aser cinematic talent ajungkettsü aser otsü ashirtem ajungmesotsü nükjidong nung CineFest ya renem ta ashi.

Iba anogo tenzükba Writer-Director, Niyaz Mujawar-i Film Appreciation nung masterclass agütsü aser iba sülen Filmmaker aser Strategist Adarsh Jain-i Smartphone filmmaking indang masterclass agüja liasü. Nikongdang Dreamz Unlimited aser DIPR ajanga yangluba "The Missing Tourist" film sayua liasü.

Kivini Shohe-i film balala asoshi shilem tajung agiba aser bendanga agütsür inyakba atema Special Jury Award agüja liasü.

'Seasons of Nagaland' omen kübok ayongzükba HIPFEST 2025 nung takok angur sangdonga liasü, kong noksa tangoker 97-i shilem agi aser tetoktepba noksa 264 sayua liasü.

Pelevizo Meyase, Tshetsholo Naro aser Asakho Chase nung nem mezüngbuba, tanabuba aser tasembuba sempet agütsü. Category section nung Avimanyu Banerjee-i Best Portrait, Moasunep Pongen-i Best Landscape aser Atam Wangsa-i Best Wildlife sempet ngua liasü.



New Delhi, December 08, 2025: Hombarñü Parliament senden tagidak mapang Parliament kima TMC MP temi Centre sorkar dang West Bengal nem tagütsütsü aliba sen agüjang, ta takhangba agüja longkak aitba noksa nung angur.

Modi küm 12 PM inyaker; Nehru küm 12 jail nung liasü: Priyanka Gandhi

New Delhi, Luchii/ December 08 (Agencies): Hombarñü Lok Sabha nung Vande Mataram ken küm 150 ajungba nüngtem nung iba onük nung o entepba mapang Congress MP, Priyanka Gandhi Vadra-i, West Bengal nung election agitsü mapang ana nung aliba agi sorkari Parliament nung iba onük nung o enteptsü benoker, ta aitsü.

Priyanka-i, "Tanü senden nung Vande Mataram onük nung o enteptsü benokba ya nükjiong ana nung liasü. Kaji, West Bengal nung election agitsü mapang ana nung lir aser iba ama mapang ka nung asen Ato kilonseri pa shilem metetdaksüner. Tanabuba nung, linük nüchiso atema rarartem nem iba sorkar yagi tai tongloksüner," ta ashi.

"Sorkari tongtibang onüktem nungi nübur piladaksüner, ibayongji tanü asenoki Vande

Mataram atema o lemteper. Iba onük nung o enteptsü menüingdak," ta lai ashi.

Laisa, "Jawaharlal Nehru küm 12 jungnua jail nung liasü aser ibaji Modi Ato kilonser inyakba mapang den kasa lir. Linük nüchiso atema pa küm 12 jail nung liasü, iba sülen pa küm 17 Ato kilonser inyak," ta ashi.

Priyanka-i, "Nai (Modi) Nehru kanga aitsür, ajisüaka pai ISRO mamenok asübo tanü nü ket nung Mangalyaan melila; DRDO mali asübo Tejas melila; AIIMS mali asübo Covid-19 mapang nung asenok komaser lila? Pandit Jawaharlal Nehru-i linük atema ali aser linük tenzükbä mapang nung asü," ta metetdaksü.

Laisa, "Ruling party nung külem tenzükertem kanga mezümeküma akümba ajanga parnoki parnok ya Mahatma Gandhi, Rabindranath Tagore, Rajendra Prasad, Baba Saheb

Ambedkar, Maulana Azad, Sardar Patel aser Subhash Chandra Bose nung dang nungia tuluba ama bilemer," ta aitsü.

"Ochiji ya lir, tanübo Modi ya taoba mapang pa Ato kilonser ama masü. Pai benokba mapatongtem ajanga linük tashi meiti kümdaksür aser sorkar nung alirtemi ola madoker, kechiyong parnoki aaker. Tanübo linük nung nüburtem mepelar aser timtem balala agi longbanga lir, ajisüaka nai item tebilemtsü onüktem bentettsü makoker," ta lai ashi.

"Nai Nehru indang kanga jembir, anungji asenoki langka inyakdi. Iba atemaji mapang ka latetdi aser pa mezügmeshiba ajak zülur o entepdi aser ibaji teti atema tatembang kümdi. Iba sülenjibo mapa manguba tebilemtsü, jenjang atuba aser telemsa adokdaksüba politics densema tebilemtsü onük balala nung o lemtepedi," ta lai ashi.

IndiGo service thinenba ajanga passenger lakh 5.8 dak tali kongshi

New Delhi, Luchii/ December 08 (Agencies): Tesüiba anogo ishika linük tesem balala nung IndiGo tayimtsü service aika thinenba ajanga passenger lakh 5.86 dak talii timtem ajangshiogo, ta Hombarñü Rajya Sabha senden nung Union civil aviation minister Ram Mohan Naidu-i metetdaksü.

Tayimtsü ticket nung sen aika atuba aser linük tesem ajaklen tayimtsü service thinenba dak sendakba tasüngdangba ka langzüdang Minister-i, IndiGo-i passenger tem nem ticket aliba sen crore 569 meyipa agütsüogo, ta metetdaksü.

"Tesüiba anogo ana-ase

tsüngda ainlen senzürtemi timtem ajangshiiba atema sasa-a bilemtsür. Thinentsüba 5,86,705 atema sen crore 569 meyipa agütsüogo," ta pai ashi.

IndiGo market share dak sendakba nung Naidu-i, "Aviation sector nung tetoktepba alitsü atema sorkari ajungshir," ta metetdaksü.

MP Milind Deora-i asüngdangba langzüdang Minister-i, India-i tongtibang airlines pongu nungita yaritsü koka lir aser airlines tasen amenoktsüji ministry atema tongtibang, ta ashi.

"Iba industry nung shilem agir tali alitsü nüngdak. Tanü India nung airlines tulu pongu lir, aser ministry-i airline tasen tenzüksü

ajungshir," ta pai ashi.

Hombar tashi nung IndiGo tayimtsü service anogo tenetnübuba thinener. Hombarñü Bengaluru kija nunga IndiGo-i service 127 thinena liasü.

Ano külen tanga osang ka nung, Directorate General of Civil Aviation (DGCA)-i, telangzüba agütsütsü atema IndiGo CEO Pieter Elbers aser Chief Operating Officer & Accountable Manager Isidro Porcheras na nem mapang atsülangja liasü.

Executives ana dangji ghonda 24 tsüngda telangzüba agüjang ta Honibarnü tuyua liasü, saka mapang atsülangja Hombar nikongdang 6:00 ako tashi mapang agütsü.



December 08, 2025 nü Jammu nung Firefighters-i merok-mi enseptsü merangba noksa nung angur. Jammu & Kashmir kübok Rajouri aser Poonch district na kübok Line of Control (LoC) nung merok-mi mazüokteti prokshidar.

Mulungnen O



Late K. Toshi Longkumer (Akhoya)

Ozü temeim tsürabur aser kinungbo Wb. K. Toshi Longkumer (Akhoya) temang manemi aliba mapang aser pa December 01, 2025 anogo nung akümüli nung taküm tembanger onok mangyim jashi nung alidang, shirnokisa onok dang meima nübo, rongsen aser sarasadem agi yaritepogo, nenok ajak dang onoki kanga pelaba lemsateper. Nenok temeim teyariji onok asoshi tashi tasen aser tesünep angudak liasü.

Onoki item dang ya kanga pelaba shhisemer :

1. Akhoya Kosasanger Putu Menden 6 Tatar
2. Akhoya Senso Mungdang
3. Akhoya Senso Telongjem Kohima
4. Akhoya Senso Telongjem Mokochung
5. Akhoya Nungur Bendanglir Reju (ANBR)
6. Dimapur, Chümoukedima, Niuland (DCN) Akhoya Senso Telongjem
7. Akhoya Students' Union
8. Akhoya Sensotsür Telongjem
9. Akhoya Watsütem
10. Dimapur Langpangkong Senso Telongjem
11. Nagarjan Area Ao sSenso Telongjem
12. Akhoya Azuponger Tambu Semchir
13. Dimapur Ao Baptist Arogo (DABA)
14. Dimapur, Chümoukedima, Niuland Akhoya Fellowship
15. Nagarjan Phom Baptist Fellowship
16. Senden Baptist Fellowship
17. Set Free Ministry
18. Generation Countdown Youth Ministry
19. Mao Colony Society
20. Ashuhe Mao Colony Welfare Union (Kuda B)
21. Mulung Ajem Rogo Dimapur
22. Doctors & Staff of Zion Hospital, Dimapur
23. Doctors & Staff of Apollo Hospital, Guwahati

Onoki nenok nisung shia tenüngteta pelaba meshitetba atema kanga sasar, ajisüaka nenok mapa tajung onok mulungjang nung teti alitsü. Tsüngremi nenok temeim mapa asoshi talubosa moajangma ta onoki sarasademsür.

~ Temeim Kinungsü, Chirnur aser Kinungertem.

Goa Nightclub nung mi lendong atalokba ken o nung nisung aika puogo

New Delhi, December 08

(Agencies): Goa nung aliba nightclub ka nung mi lendong ataloka nisung 25 asüba tatalokba dak sendakba nung Hombarñü Goa police-i Delhi nung nisung ka puogo, ta ketdangsertemi metetdaksü.

'Romeo Lane' ta ajaba nightclub nung inyaksangji Bharat Kohli lir ta jangjaogo. Pa dang maneni asüngdangyatsü atema pa Goa-i anir aotsü.

Honibar ayaterm mapang nung North Goa district nung aliba Romeo Lane nightclub nung mi lendong nung asürtemji teimbaka club nung inyaktertem liasü. Hombar tashi nung asürtem ajak maitsü jangjaogo

Goa Police-i club chief general manager Rajiv Modak, general manager Vivek Singh, bar manager Rajiv Singhania aser gate manager Riyanshu Thakur nungera puogo.

Ketdangsertemi Romeo Lane club chain-a bushisüngdangdar. Iba hospitality group indang Vagator nung beach shack ka aser Assagao nung aliba club kata

shibangtsüogo.

Amongñü Goa Police team ka Delhi-i apusoa aoba sülen club promoters ana- Saurabh Luthra aser Gaurav Luthra na bushi tenzükogo.

Goa Chief Minister Pramod Sawant-i, club promoter anaji aputsü, ta metetdaksü.

Goa yimtiba, Panaji nungi kilometer 25 shi pilar aliba 'Birch by Romeo Lane' nightclub nung mi lendongji fireworks amshiba ajanga liasü. Iba club ket nungji fire department NOC maliasü, ta jangjaogo.

Iba lendong nung asürtemji 20 bo staff tem liasü aser tanünga ponguji raliwalirtem liasü. Iba club nungji "electric firecrackers" amshiba ajanga mi lendong atalok; iba lendong ya Honibar aonung 11.45 ako nung ataloka liasü.

Chief Minister-i state Chief Secretary V Candavelou aser DGP Alok Kumar na dang iba club lapoktsü atema temelaba agütsür sorkar ketdangsertem jangjaba sülen temerenshi agüjang, ta tuyuogo.



TIR YIMYIM YIMOBILEM (EDITRIAL)

DIMAPUR TUESDAY, DECEMBER (LUCHII) 09, 2025

Mebilemdangi inyakba

Tang ama benjong mapang arudang, talisa Dimapur yimti ama nung yimten nung ketdangsertem asoshia kanga belemtsüba mapang lir, kechiyong Naga nunger yimkong meyong benjong asoshi shishitsüba yimtiji Nagaland nung Dimapur ya dang lir, anungji Nagaland ajaklen nungi pei pei yari benjong asoshi lilaliyongtsü asoshi Dimapur-i arur. Anungji, benjong mapang lendong mataloki yimti tesünep nung ayutsübaji yimten nung ketdangsertem mapa lir, ano osettsüset nung jenjang talila metudaktsüi azüoktsübajia yimten mapa aser ano tongtibangsa, tanü asüngbo nisung shiai gari bener arur asünungji, yimti tesem ajaklen gari moutet nungtepa mayutsüsa traffic sentong yanglutsübajia yimten nung ketdangsertem mapasa asütsü. Itemji tebang agi jembitsübo temela saka mapa kuma inyaktsübo tasak, aji teinyakdang aser tajangshirtemi dang metettsü. Aji oda, garibo anogo shia teimba - teimba arur saka yimti yimdong lenmangbo kasa dang aser lenmangji ulushitsübo tamakoktsü, anungji kasa lenmang nung gari teimba kumaka, gari nungtepa meyudaktsüi yimti yimdong tezülen anendaktsütsü mesüra ajanga süidaktsütsü asoshi tawato yimti nung yimten ketdangsertemi traffic sentong yangluba asenoki angashiogo. Iba amaji jungjunga bilemdanger yangluba sentong agi nübortem melamelaa oli aruli süteter, anungji mapaa melamelaa atemer aser anisüngzük angur. Ajisüaka, tang Dimapur nung yimten ketdangsertemi kangasa mebilemdangi inyakba mapa kaji, Dimapur yimti tiyong külen amenbanger 'Night Carnival' aliba sentong ya asütsü. Ibaibo mashikoshi, tsümar oshi nung 'ulta-pulta' mapa ka lir. Tangarbo tang ama benjong mapang tangalen nungia nisung aika arutsüji ta bilema, gari arulen aser taolen bentet-benteta yanglur gari anena yudaktsütsü asoshi tesem talila dena bushia yutsür. Ajisüaka, asenok Dimapur-bo kodaser nisungtem yimti yimdong nung taolena maka timtemdaktsütsü ta bilema atongtsü amato, City tower clock nungi Holy Cross school kima tashi nikongdang nungibo gari kata ajanga moutettsüsa yimdong nokdanga toktsüba lenisüba nungjibo nübortem asoshi bilemstüba shisatsübo mangur. Ashi, tang amai benjong mapang "night Carnival" ayongzüka longsutepnüra, nübortem benjong mapang aritepa senzüdang tenokdangba timtem majurutsüsa yimti tezülen moapu tesadem tajung ka shimteta ali nunga koda jungla ta bilemer. Aji oda, shitakba agibo, yimti nung telidak purtem dang masü saka ano talisa tangalen nungi arurtema maritepi mapang peria agia shishir aotsüsa akok tashi yimti yimdong ajaklen gari nung aser tetsüng agia oli aruli ta jajettsüsa lenmang shibangtsü melen, shibanga aliba lenmangtema lapoktsütsü bilemdangtsüla. Ano, ketdangsertemi yimti nung nübortem tipdema shishia senzütsü asoshi bilemdangtsüba mapa kaji, dokan lapokba aser shibanga mapang ya atsülangtsüla aser kokra tang ama benjong mapangbo dokan-tem ya aonung ayaterem tashi lapokdaktsü nunga ajungtsü. Nisungtem yimti nung shishilembadak nungtepba ya dokan meshibangdangsa shishi atemtsü arishir, anungji nisung ajak mapang kasa nung shishilembadaki arur. Ashi, yimti nung shi anga aser aonsutsü ayokba dokanem dang masü saka süoshi aser osettsüset ayokba dokanem dena anepdang 8:00 ako nungi aonung ayaterem tashi lapok nungbo, telidak purtembo tangar tangalen nungi marudang anepdang yakta mesüra tangar meyipa oadoker aonung dang shishii arutsü. Iba ama sentong jagia yimti nung shishilemba dak gari aser nisungtem nungtepba timtem nungi tuluka anisüngzük angutsü. Kechi mapa südirsüaka, sentong yanglurtem dak tebilemdangba aser teshisadangba kanga alitsüla aser tangar dena shisalemsateptsüla, kechiyong alima nung nisung shingaia ajakbo meteta maka aser ajak rajemba nisungbo mali. Kati ka meteta lir aser kati tanga ka meteta lir, anungji nisung shiai meteta alibaji kodang bendena telemtetba agidir, aji temetetertemi agiba telemtetba asür, anungji tajung aser tapet asütsü. Atangji, Diimapur asoshia bilemdanga sentong tajungba aser tapetba melenshia inyaktsübaji temenu mali, tanga inyaktettsü.

OLEMSABANG

LAISHIBA NUNG 666 YA SHIRNOK ASER SHIBA

~ N.T. Jamir, Mokokchung

'Jungkai Adok 13:1 Idangji tzüyim nungi shiruru ka dak tezü ter aser tekolak tenet tener adokya ni angu. Iba tezü nung korang ter aser iba kolaktem nung tatalaba tenüngtem zülua liasü. 'Tezü terji European Union nung kin ter longjemer tentetba telongjemji lir. Parnok sena balaka Euro amshidaki; koba 2000 küm January 1 anepdang 1 ako nung sayaba alima dang sangdongogo. Tezü terji parnok kin ter temaitsü aser iba telongjemji Italy nung amenoka lir. Aser tekolak tenetji Italy yimtiba Rome aser iba yimti ya tebur tajung tenem tenet agi meketa lir.

Parnok kin terji Khristan lima lir aser aji noklang shilem nung 75 bo Roman Catholic lir. Iba indang ya jangja metetbaji, Australia nunger ka tenüng agi Chuck Smithe, shiba California nung arogo ka nung pastor inyaker, pai Khristan anemerji (antichrist) Roman Catholic arogo nungi tenzüksü ta sangdonga lir. Chuck Smithe yagi Revival Crusade ta sür mission ka tenzüka: kaket keno aika zülua itemji ajanga Tsüngrem o alima ajunga dangi sangdongba wadang ka nung liasü. Pai ashibaji, Jungkai Adok 17: 3 Tekolak tenet aser tezü ter aketba temerem shiruru ka nung mena aliba tetsür ka ni angu." Iba teteziü Pope John II-i temerem subotsü sübur liasü.

Lai nung aliba amaji Pope John II indang subotsüji nakrema merema subo aser sentsüprang korang semer liasü. Australia nunger sangi ashibaji parnokji Liberal Christian lir. Jungkai Adok 17:2 Alima chuba temi la den japojaru benshi. Ano Jungkai Adok 17:1 Tzü jenti manung mena aliba nüktapangtala tetezü alima ajaklen school lapoka rongsen nung nüktapangda sen bendenba indang ashir. Kodang Pope John II asü, iba sülen Pope Francis nungibo subotsü temesüng den Yihuda nunger korang temesüng tila ka semer angutsü. Aser tang ya alima nung rongsenketsüng nung Italy ya temaba jenjang nung lir ta ashir. Aser kodang temeshipur ayipa tutir Israel-i Italy den küm tenet atema yimjung yanglua züngzükteptsü saka aji küm ana dang lirbo raksatsü, aser alima yimli ajak anentsü; aser tashi tait chuba ka shimtsü. Paji Popeji aser pa alima ajak madak kanga dang tashi tait chuba asütsü: pai ajak azüoktsü. Kechiaser idangji timtem tekangshi tulu alitsü; lipok nungi tang tashi nung iba ama mali aser ano malitsü (Mathi 24:21). Aji kodang ataloktsü? Ibai temeshipur ayipa tur ataloktsü. Lai-i ashir, iba anogo nung temeshipur asoshi sükdoktsü; aji oda kodang temeshipurtem ayipa tutir iba sülen küm tenet rishikangshi mapang alitsü, idangji Israel-i Yirusalem tenla ki; koba Tsüngremi Solomon nem estimate agütsür südaktsü, iba kürak yanglutsü. Daniel 9:25 Anungji ya metetang aser angatetang, Yirusalem yanglushitsü aser tanaben yanglutsü temelaba o aoba nungi mezüja shimtetba chuba chir aru tashi hopta tenet, ajisür hopta roker ana yimdong aser seto dena oda timtem tensa nung aji yanglushitsü.

Iba mapang nung chuba shibai alima ajak nung yimsü asütsü pai sealji 666 ajentsü aser aji majenerbo alitsü makoktsü, ayoktsü makoktsü aser iba mapangji rongsenketsüngji kenyongi talubosa alitsü. Shirnok ayipa matu aser iba süngyanglu mekülemertem aser iba mojing sealji majenerkem asoshi kanga tasak aser temesü asütsü. Shinoki iba chubaji mekülemlir mesüra sealji majenlir parnokji aya agi asütsü mesüra Yisu mechi tekong atangtsü. Küm tenet rishikangshi temli temeshipur meyrjang aika Yisu-i anir alutsü aser Yirusalem anüdoklen tatsüka pilar aliba Olive tenem nung Pa tetsüng ajemoktsü. Yang nung jagi Yirusalemi aitsü; Yirusalem yimti ya süngkümping tenet lir aser süngkümbong shiaji tenüng balala lir. Süngkümping terokbo nisung yili, adokli ta ajar, saka kabo san süngkümping-hon süngkümping lir; ajibo shibanga lir aser aji Yisui kümzükbapur anir lapoktsü; aji tenla ki koba rishikangshi mapang asü yangji Pa amentsu; tebu chuba menden nung amentsü aser küm meyi ka yimsü asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Küm ana sülen takümbo Bethlehem nung Khristmas sübotsü inok



December 06, 2025 aonung Bethlehem nung Church of Nativity kima Manger Square nung Khristmas süngdong nung tesangwa tsükolokba sentong nung nisung aika adenba noksa nung angur.

December 08, 2025: Gaza nung rara ajanga tesüiba küm ana tashi Bethlehem nung Khristmas benjung memongi aruba sülen takümbo West Bank kübok Bethlehem nung Khristmas benjung sübotsü inokogo.

Tawa Israel aser Hamas na tsüngda ceasefire tezüngzüktep yangluba nung ajemdaker Bethlehem nung akhi ama Khristmas benjung sübotsü inoktsü aser Nativity Church kima Khristmas süngdong nung tesangwa inoktsü telemtetba agia liasü. Ajioda December 6 aonung Bethlehem nung Church of Nativity kima Manger Square nung Khristmas süngdong nung tesangwa tsükolokogo.

Bethlehem nung Mayor, Maher Canawati-i, "Küm ana tashi ola madoki aruogo, Khristmas benjung mamong aser mapa maliasü. Yangi tourism ajanga onok yangi alir saka tourism jenjang kanga mejungi liasü," ta metetdaksü.

"Ceasefire tezüngzüktep liaka Gaza nung Khristantem densema nübur aika timtem tensa nung lir, anungji Bethlehem nung Khristmas benjung amongtsüji tim masü, ta karibo bilemtsüa akok ajisüaka Khristmas benjung yabo kodanga methinentsüla, ta nibo bilemer. Iba tesangwa ya asenok atema teimla lir," ta pai ashi.

Bethlehem nung aliba Manger Square nung Khristmas süngdong nung tesangwa tsüklokba dang masü saka yimti lenmangtem ajak nung Khristmas benjung sübotsü inokogo.

Mayor Maher Canawati-i, "Bethlehem nung Khristmas benjung asentenshir amongba atema onok pelar aser Bethlehem nung bendangertem-a anguba atema pelar. Tangbo onoki chichiba tanela nung Khristmas mongtetsü," ta ashi.

Ano nisung kati, "Taküm

Khristmas ya tesünep nung mongtetra ibaji ajanga alima dang osang tajung ka sangdonger asütsü," ta ashi.

Bethlehem anasa aliba jilatem- Beit Jala aser Beit Sahour nunga Khristmas benjung sübotsü inoktsü. Takümbo Israel nung aliba Palestine nungertem aser bendanger raliwalirtem aikati item yimti semdangtsü.

Bethlehem nung alir Nadya Hazboun-i, "Bendanger raliwalirtemi Bethlehem semdangtsü aliba atema ni pelar," ta metetdaksü.

Russia nungi raliwalir, Angelica-i, "Ni tang agi tanabenbuba Temeshi Lima ya semdanger. Nisung ajaki akumli nung khenbosa Temeshi Lima ya semdangtsüla," ta ashi.

Tourist guide, Hamza-i, "Iba yimti ya raliwalirtemi semdangba yimti ka lir. Yangi tourism melira taküm mali. Tesüiba mapangtem ama nisung aikati iba yimti semdangtsü ni imlar.

Europe, Middle East, America, Latin America aser tesem ajaklen nungi nisungtemi iba yimti semdangtsü imlar. Onoki Khristams süngdong nung tesangwa tsüklokogo. Onoki raliwalirtem ata-a alitsü," ta ashi.

2023 küm October ita nung Hamas teloki Israel amakba sülen Israel-i Gaza amakba mapang nungi tenzüka Bethlehem nung rongsenkettzüng jenjang kanga mejungi aküm. West Bank nungi Palestine nunger aayanger meyirjang aika Israel telungi maitdaksüi liasü.

Yisu Khrista asoba yimti, Bethlehem ya Palestine nunger West Bank kübok lir, saka Gaza Strip nung Palestine nunger jenti tepsetba atema tejashi nung 2023 küm nungbo Bethlehem nung Arogotemi Khristmas benjung mamong saka tekülem sentong agiba den külemi sarasadem dang

agia liasü.

Küm shia Khristmas mongpu nung alima tesem balala nungi temeshi aini aoer Khristan meyirjang aikati Bethlehem semdanger, ajisüaka tesüiba küm ana nungbo Bethlehem nung Khristmas kanga azüngmeyaker liasü.

2024 küm nunga Bethlehem nung Khristmas benjung junga mamong; bendanger raliwalirtemi Bethlehem mesemdangba dang masü saka Bethlehem nung alirtema aikati yimti toktsür ao.

Bethlehem nung Church of the Nativity kima Yisu Khrista asoba tesem 'Manger Square' kanga azüngmeyaka liasü aser dokantem ajak shibanga liasü.

Joko tesüiba putu aika Middle East nung Khristan nütsüng tajemba dang akümer, yamaji West Bank nunga Khristan nütsüng kanga ajema kümogo.

British nungeri yimsüsüba tesüsabuba küm (1947) Bethlehem nung nütsüng shilem 85 bo Khristantem liasü saka 2017 census nungbo Bethlehem nung nütsüng 215,514 nungi nütsüng shilem 10 shi dang (23,000 dang) Khristantem liasü.

1967 küm Israel aser Arab linüktem tsüngda raraba sülen Israel-i West Bank atsünga agi. Israel-i akhi puti otsü aser Laishiba nung ajemdaker item li ya parnok meyong ta ashir.

Küm shia Bethlehem nung Khristmas kanga longsoa amonger; talisa raliwalir bendangertemi iba yimti semdangba ajanga iba benjung kanga longsoa amonger, ajisüaka rara nung asür Palestine nungertem nem akhüm agüja küm ana tashi Bethlehem nung iba benjung mamong saka Khristmas tekülem sentong aser sarasadembo agia liasü.

Bethlehem ya Yirusalem nungi mile 6 shi dang pilar West Bank kübok lir.

ANOGO ABEN TSÜNGREM DEN

Alima shisa shir dang nungi parnok shisa takaba liasü

Item shisatsü balaka liasü.

Tsüngremer shisa taka nisungji alima shisatsü nisung dang nungi balaka. Parnok nungi petinu samar külen, shisa kartemi tasen chuba indang kong soa lir tali asüngdangtsü mulungtet. Atangji parnok dang tasen Chubaji Yirusalem angutsü ta shir alitsü. "Yihuda nunger Chubaji kong soa lir," ta asüngdanga parnok aru (Matt. 2:2).

Yirusalem nung alir ajaki tasen chubaji külemya alitsü ta parnoki bilemer alitsü südi. Saka yamaji masü liasü. Kodang Herodi iba osang angashi pa tipmatem (Matt. 2:3).

Yirusalem nung alir shingaia Messiah asobaji bilema mali asü. Kodang Herodi putirtemi dang tasen chubaji kong asotsüla ta asüngdang, parnoki Laishiba nung bushitsü tenzüc. Tejen Lai nung yimsü nung tesayurtemi Khristaji Yihuda nung aliba Bethlehem nung asotsü ta ratettsü (Matt. 2:5).

Saka item shia akartemi shitakba telangzübaji agütsü, yimsü nung lenirtemi parnok temetetba liaka parnoki kodanga Yisu majuru. Tezülurtem aser putirtemji alima shisa akartem noksa lir. Parnok metet saka kecha meinyak! Anüdoklen nungi aruba nisungtemji shidakba Tsüngrem shisatsü akartem liasü. Parnoki Pa O amang aser langka inyak. Parnoki iba jagi mapa inyak. Parnok theologyji teradang, saka parnok tashi angabaji tabensa liasü. Laishibai ashir, petinu tesangwaji kong Yisu soa lir ibaji matong tashi parnok jakdang ao (Matt. 2:9). Tsüngremi parnok Kinü Khrista dangi ani. Kotaker shisatsüji teti alima shisatsü dang nungi temaba.

Korea Arogotemi Sri Lanka nung lendong agi kongshirtem yaritsü

December 08, 2025: teyari agütsüba maparen nunga Communion of Churches in shilem agidaktsüner," ta Korea (CCIK)-i Sri Lanka metetdaksü.

Sri Lanka nung lendong tulu ataloka nisung jenti asüba sülen National Christian Evangelical Alliance of Sri Lanka-i aika dang teyari meshia liasü.

CCIK-i züngsem denominations aser organizations dang nungi senotsü tenla bendenba sülen December 15 nü National Christian Evangelical Alliance of Sri Lanka (NCEASL) nem senotsüji bendanga agütsütsü.

December 6, 2025 nü Sri Lanka ketdangsertemi CCIK-i züngsem ashiba agi, November ita denominations aser Arogo den affiliate süa aliba organizations ajanga tzümetsüng aser dang Sri Lanka nung lendong agi kongshirtem atema sarasademaktsüner aser teyari agütsüba maparen nunga shilem agidaktsüner, ta mepishia metetdaksü.

CCIK-i, Sri Lanka nung tesüiba küm 70 tsüngda iba lendong ya tulutiba liasü, ta metetdakja iba linük atema sarasademtsüba den külemi teyari agüjang, ta mepishi.

AO OSHI ANGAZÜKDAK:**TANÜ ANGAZÜKTSÜBA OJANG****Tsüktep**

(v) tarak keta ajurute, gari ana manentet ajurute (collide)

* Gari kanga karaa aniba agi tangar gari den tsüktep.

Tsüktettsükra

(adj) soru tamajung, memedem, mesüsü (irregular, ugly, podgy)

* Asenoki tsüktettsükra maliba süngjangtemang shimteta alir.

**OLONG PAITEP # 7354**

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN

2. Auo nung chiyongtsü asenba

- (7)

5. Mangyimba mapang

- (5)

7. O tamendakdak

- (4)

8. Pei dak malangba

- (7)

10. Juli

- (7)

12. Sen ayudak

- (7)

14. Tenük agi ajitet

- (4)

15. Tamajung aküm

- (5)

16. Apuso

- (7)

LANGTSÜNGLEN

1. Lenmang

- (7)

2. Aor kidong ka tenüing

- (6)

3. Tenarong maten

- (6)

4. A ___ g

- (3)

6. Mopung apodoka

- (3)

ola adokdaksüba

- (3)

9. Tongtipang tagitsü

- (7)

10. Menungra bilem

- (6)

11. Aiür

- (6)

13. S ___ k

- (3)

14. T ___ r

- (3)

OLONG PAITEP # 7353 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

England kübok Penarth, Vale of Glamorgan nungi arishi küm 11 tain Max Baker-i "video game developing" atema Guinness World Record ka yangluogo.

2025 May ita Max-i Guinness World Record angutsü atema ghonda 4 agia game ka yanglu aser ita trok lir külen pai "youngest male video game developer" otsü yangluba kuli agütsüogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymym@gmail.com nung yokang mesüra Tir Yimym bureau tem nung agüjang.

Garó Hills nung Me'gong Festival 2025 tembangogo, Nisung aika aden

December 7, 2025 nü Cherrapunji Eastern Craft Gin ajanga Mountain Berry Gin with Cherry Blossom sayaogo. Iba gin ya tzunglu tzu ajanga distilled asü aser unsweetened, uncoloured foundation amshia yanglu. Iba gin tasenba ya Cherrapunji aser Mawsynram nung tenem talangtem nungi agiteta yanglu.

Tura, December 8, 2025

(Agencies): Meghalaya kübok Garó Hills nung Me'gong Festival 2025 kanga takok ngua mungogo. Anogo ananü benjungmung nung nisung 55,000 tema denogo.

Iba benjungmung nung international stars, national performers, aser Meghalaya nungeri shilem balala agiogo.

Anogo anabuba, Deobarnü Aski Stage nung British pop band Blue, global EDM duo Yellow Claw, singer-songwriter Prateek Kuhad, aser Bollywood star Kanika Kapoor nungeri shilem agia liasü.

Blue züngsem Antony Costa-i iba benjung ya kanga tajung ta ashi aser tanüingba züngsemtem-Simon Webbe, Lee Ryan, o Duncan James nungeri Garó

Hills ya "paradise" ka ta shia pelaba metetdaksü.

Kanika Kapoor-i Chittiyaan Kalaiyan, Baby Doll, Jawaani Le Doobi, aser London Thumakda kentem aten. Prateek Kuhad-ia Saansein, Cold Mess dena nungtugu kenten tena liasü.

Day 2 nü Kingfisher Stage nunga Hoi Hoi Makbil, G-Hills Finest, Crack Gang, Rough Road, aser Nokpante ajanga shilem agia liasü.

Mezüng anogo benjungmung nung global icon Richard Marx, Bollywood singer Neeti Mohan, Grammy-winning reggae artist Julian Marley aser electronic music favourite Nucleya nungeri shilem agia liasü.

Zubeen Garg tasodak Tura nung Neeti Mohan-i pa nem tetushi agüja Mayabini ken aten.

Iba benjungmung nung Chief Minister's Meghalaya Grassroots Music Project (CM-MGMP) kübok bands-i shilem tajung agia liasü. Benjung lapokba anogo nung CM-MGMP bands 7-i shilem agi.

Me'gong Festival nungsa music dak alia sentong balala agia liasü. Great Garó Hills Cook Off nung MasterChef India Season 8 runner-up Nambie Jessica Marak-i tetushi süa jaoker ka ama shilem agi.

Iba benjung nung adenertemi sobaliba saisapongtem, Brew Village semdang, cosplay reprang, Miss & Mr Me'gong Contest nung aden aser craft markets, food stalls, VR zones o PRIME Meghalaya kübok entrepreneur exhibits repranga senzü.

Assam sorkari süngolu nung mapa inyaker nem land rights agütsür**Guwahati, December 8, 2025**

(Agencies): Assam sorkari süngolu nung mapa inyaker lakh 3 jungnüa nem land pattas (title deeds) agütsütsü lemtetogo.

Iba ya tea estates 825 nung labour lines nung alir kibongtem asoshi lir aser Assam Fixation of Ceiling on Land Holding Act, 2025 yanglushiba ajanga mapa akümer.

Iba Act yanglushiba ajanga India nung tang mezüng atema industrial land nungi mapa inyakerkem asoshi permanent residential colonies akümtsü.

Süngolu nung mapa inyakerkem ya India kübok tesem balala nungi tashiyim agi

anir aruba liasü aser parnoki küm 200 tema company-allotted quarters nung dang lia arur. Parnok mapa nungi anisüngzüik anguba sülen quarters toktsür aotsüsan akümer aser parnok aika talidak maka akümer mesüra kinunger den ang alitsüsa tia ajurur.

Iba lemtet atema süngolu nung mapa inyakerkem Prime Minister Narendra Modi, Chief Minister Himanta Biswa Sarma, aser Assam Tea Tribes & Adivasi Welfare Minister Rupesh Gowala nunger dang pelaba metetdaksüogo.

Iba Act yanglushiba kübok labour line lands ajak sorkar meyong akümer. District

commissioners aser Mandals ajanga estate shia surveys, mapping, aser verification asütsü. Süngolu nung mapa inyakerkem yaritsü atema süngolu shia züngsem pezüzü agi akümba ludentem tentettsü. December 2025 tom ka nungi land mapping aser form-filling mapa tenzütsü sentong lir.

Iba inyakyim ajanga ali 2.18 lakh bighas shi ka ayimjemtsü. Sorkari tea estates nem bigha ka nung Rs 3,000 shi agütsütsü aser iba ya Rs 65 crore shi adoker. Assam Tea Corporation kübok tesemtem aser Tinsukia district nung süngoludem nung mezüng atema verification aser survey work inyaksü.

Arem shititemi Assam yimtsüngtem nung timtem agütsür**Guwahati, December 8, 2025**

(Agencies): West Karbi Anglong kübok Kheroni nung human-elephant conflict kanga mejungi kümogo kechiyong arem shiti 150 shi kati alu aser nisung alidak senzür.

Arem shititem ajanga mapang shia tsünusenbongtsü achiba dang masü saka tsüklu,

mojilu aser yimtsüngtem indang lenmangtem nung amunger ta yimdaklirtemi ashi. Aluyimertem aonung tipjanga memejangteter aser parnok ki o chiyungtsü ayudak anüker.

Arem shiti telok ajanga tsüklu aser aonsotsü alutem chimatsüogo, mojitem raksatsüogo aser tsük yua aliba raksatsüogo. Arem shititem

ajanga kiojen aika raksatsüogo aser Khusbu Rajbhar ta ser aiür ka taküm samaogo.

Southern Forest Range-i shititem aremi yoktsü meranger saka takok menguteti lir. Taoba Member of Parliament Horen Sing Bey-i tan hopta arem shiti adokba tesemtem sema senzüogo.



Manipur nung State Central Library-i December 7, 2025 nü Imphal nung 32nd Imphal Book Fair 2025 atema curtain-raiser rally ayonga agiogo. Iba sentong ya District Libraries, Department of Art and Culture, Government of Manipur, Manipur Library Association (MALA) aser NGOs balala yaritepa ayongzüik. Iba Imphal Book Fair 2025 ya December 15 nungi 24, 2025 tashi alitsü.

Nigeria nung pua bener or aliba tanur 100 meyipa anir aruogo



Abuja, Luchii/December 8 (Agencies): Nigeria nunger ketdangsürtemi taoba ita Catholic school ka nungi tanur noklang aika pur aoba rongnungi 100 bo meyipa anir aruogo, ta ketdangsürtem aser local media sangdong balala ajanga metetdaksü.

Tanur 100 ya Nigeria yimtiba Abuja tongogo aser Niger State nung local sorkar ketdangsürtem nem agütsütsü liasü, ta United Nations source kati AFP news agency dang ashi.

"Parnok ya Niger State nem Hombarnü agütsütsü," ta source yagi AFP news agency dang ashi.

Nigeria nung The Guardian osang kaketi Deobarnü sangdong ka ajanga ashiba agi, tanurtem temang tendangdar aser ken o kar metetdaksüba sülen parnok kinungertem den longjemdaksütsü.

Tir otongdaria tanur 100 chiokba osang ya Deobarnü jangjashitsüogo.

Ozüng alema inyaksangshiba nisungtemi

November 21 nü Niger State kübok Agwara district nung St Mary's School nungi kaketshir 303 aser tesayur 12 pur oa liasü.

Tanurtem ya arishi küm 10 nungi 18 tsüngda aliba tetsür aser tebur ajak meyoktepa liasü, ta Christian Association of Nigeria (CAN)-i metetdaksü.

Kaketshirtem pur aoba sülen anogo ishika lir kaketshir tenem ajen aser parnok kidangi meyipa aruogo. Deobarnü kaketshir 100 chiokba sülen ano kaketshir 153 aser tesayur 12 item nisungtem ket nung alitsü ta amanger.

Iba ya matalokdang ozüng alema inyaksangshirtemisa kidanger Kebbi State kübok Maga jila nung Government Girls Comprehensive Secondary School nungi tetsür chanu 25 pur oa liasü.

"Onoki parnok meyipa arutsü atema sarasadema ataogo. Iba osang ya shitak süra tepelatsü osang lir," ta Kontagora diocese nung Bishop Bulus Yohanna otongdar Daniel Atori-i ashi.

Nigeria nung 2014 küm Chibok jila nungi tetsür chanu

270 pur aoba sülen Nigeria nung tang nisung timba purogo.

2014 küm nungi tang tashi nung Nigeria nunger 1,400 dak tema purogo.

United States tir Donald Trump-i Nigeria nunger Khrista dak amangertem samatsütsü meranger ta ashiba sülen tang item kaketshirtem ya pur oa liasü.

Nigeria indang Ministry of Foreign Affairs-i taoba ita Al Jazeera dang ashiba agi, tamangba yimsü balala dak amangertem ajak iba timtem lendong yagi kongshir lir.

"Nigeria nung nisungtem tepsetdar ta jembiba ya shitak aser onoki agizüka arudar, saka asürtem ya Khrista dak amangertem kija masü. Muslim nungera tepsetdar, tetsü tebou tamangba yimsü dak amangertema tepsetdar," ta Ebienfa-i ashi.

Nigeria-i Khristantem kümzüka meyuteter ta shia Trump-i iba linük amaksü amokmerena liasü. Paisa, Nigeria nem teyari agüja aliba anentsü amokmerena liasü.

Tetsür 19 dak tashiyim benshiba atema RSF aitsü

Khartoum, Luchii/December 8 (Agencies): Sudan nung doctor telok kati tetsür 19 den tashiyim agi shi nung medemba atema paramilitary Rapid Support Forces (RSF) aitsüogo. Item tetsürtem ya Darfur kübok el-Fasher yimti nungi ajenba mapang iba ya atalok liasü.

Sudan Doctors Network-i ashiba agi, parnoki al-Dabba-i jena aoba tetsürtem dak tashiyim benshiba indang mangaoka liasü.

Tetsürtem rongnung anabo mashisa liasü, ta iba telok yagisa metetdaksü.

"Sudan Doctors Network-i El-Fasher nungi jena aoba tetsürtem den tashiyim agi shi nung medemba atema RSF pur aitsür," ta iba telok yagi X nung zülutsü.

Sudan ya 2023 küm April ita Sudanese army aser paramilitary RSF na rara tenzüka sülen tang tashi rara nung lir. Iba mepetmesü nung nisung meyirejang aika tepsetogo aser nisung million 12 dak tema pei talidak ki toktsür jenshia aotsüsa kümogo, ta United Nations-i metetdaksü. Iba rara ajanga ano nisung million 30 humanitarian teyari nüngdaka kümdaksüogo.

Ita 18 sabanga ayuba sülen RSF puri North Darfur yimtiba el-Fasher October ita atsünga liasü. Iba yimti ya iba tesem nung Sudan army tamendakdak tatembangbuba liasü.

Iba yimti nungi jena otetertemi yimti nung nüburtem aika tepsetba, tetsürtem tashiyim

agi raksatsüba, rakzükrakdemba amala bilemtetshia jembiba sülen alima kintemi iba anema ola adok tenzü.

Amnesty International-i rara nung aibelenba atema RSF pur aitsüogo aser kasa mapang nung UN Human Rights Council-ia el-Fasher nung tashiyim maparen inyakba bushisüngdangtsü tetuyuba agütsüogo. Ketdangsürtemi shirnoki Darfur semdanga teküzmükertem den jembio, parnoki ashiba agi, iba tesem ya kanga mejungi raksaogo aser "crime scene" ka kümogo, ta ashi.

Sudan Doctors Network otongdar Mohammed Elsheikh-i ashiba agi, RSF sepaitemi tetsürtem dak tashiyim benshiba ya osang agütsüba dang nungi kanga agi timba lir ta noklang nung noklang tejangja.

"Lokti timba kati iba ya maksü ama agizüker asünung tetsürtem timbai parnok dak tashiyim benshiba indang mejembir," ta pai ashi.

Elsheikh-isa, par teloki el-Fasher nungi Tawila-i jena aoertem rongnung tetsür 23 dak shi nung tashiyim agi medemba indang mangaoka lir ta ashi.

"Tia maka iba amala timtem ajangshirtem ya arishi küm 15 nungi 23 tsüngda alirtem timba lir," ta pai shisem.

Sudan Doctors Network-isa, alima kintem dang Sudan nunger tetsür aser aiür chanutem kümzüka ayutsü atema takaratiba nung jenjang agitsü tayongzüka agütsüogo.

Thailand-i Cambodia arütsülen tayimtsü amshia amak

Bangkok, Luchii/December 08 (Agencies): Thailand mitkari Cambodia den mangatettep aliba arütsülen tayimtsü amshia amak, kong Thai sepai ka aser Cambodia nunger civilian pezü tepsetba atema Southeast Asia nung kidanger linük ana ya tenüng senteper.

Hombarnü sangdong ka agütsüba nung Thai mitkar atema odongtar kati ashiba agi, Ubon Ratchathani province nung Thai sepai ka asüba sülen Cambodia nungeri amakba ajemdaksütsü atema Thailand-i aircraft tem yok.

Nisung ti yiru, ta Major-General Winthai Suvaree-i ashi. Thai indang sangdong nungsa Cambodian sepaitemi Deobarnep 5:05 ako nungi tenzüka Hombarnü tashi prangbong tila aser "curved weapons" tem khaloktsü aser par sepai asüba anepdang 7:00 ako meta osang aru, ta shia liasü.

Ajisüaka Cambodia-i magizüker.

Cambodia mitkari

Facebook nung sangdong ka agütsüba nung Thai sepaitemi Hombarnep 5:00 ako nung mezüng amak ta ashi. Anogo aika rara mesüba mapa inyakba sülen amakba alitsü aser Cambodia sepaitemi telangzüba magütsü, ta ashi.

Cambodia indang Information Minister Neth Pheaktra-ia mapang tatsüka lir AFP news agency dang Thailand sepaitemi amakdang Cambodian civilian pezü tepset ta ashi.

Asürtem ya arütsülen aliba Oddar Meanchey aser Preah Vihear province tem nungi lir aser ano nisung 10 yiru ta pai ashi.

Sisaket province kübok Phu Pha Lek-Phlan Hin Paet Kon tesem nung khen khatemper anogo ka lir iba ya ataloker, aser iba atema kati ka tenüng sena liasü.

Thai army-i ashiba agi, Cambodia-i injang khaloktsüba nung Thai sepai ana yiru aser Thai sepaitemi tayang kepzüka minute 20 shi khatemp.

Cambodia-ibo Thai tsütsü nungi mezüng injang akha aser par sepaitemi telangzüba magütsü ta ashi.

July ita anogo pongu kanga sashia raraba tembanga ceasefire sangdongba sülen kidanger linük ana tsüngta ibai azüdokshi tesüsaba alitsü. Linük ana tsüngta raraba mapang nisung 48 tepsetogo aser nisung 300,000 shi khen atema tesem balalai jena ao.

Ceasefire ya Malaysia Ato Kilonser Anwar Ibrahim aser United States Tir Donald Trump nati tetsüngtai ia jembiba liasü, aser parnok lia October ita Kuala Lumpur nung linük ana tsüngta peace agreement tuluba nung meyongnem agitepa liasü.

Ajisüaka taoba ita landmine ka apokba nung Thailand sepai ka asüba sülen parnoki iba ceasefire mapa kuma amshiba anena liasü.

Landmine apokba atema Cambodia-i par khuret masü aser iba bomb ya taoba mapang raradang mepoki aliba lir ta ashir.

Hombarnü Thailand Ato Kilonser Anutin Charnvirakul-i azüdokshi maginer saka security azüoktsü asoshi mitkari nüngdakba mera agitsü renema lir ta ashi.

Cambodia-ia tanaben rara metenzükner ta ashir.

"International law nung aliba ama yimjung leni mepetmesü angatetteptsü aser taoba mapang agreement yanglua aliba ajunga akumtsüboba tanüla nung nokdaker, anaben amakdang Cambodia-i tayang mekepzüker aser maneni tensa kanga saksalema asadangtar," ta Cambodia mitkari ashi.

Taoba mapang Cambodia indang ato kilonser inyaka alisang aser tang ato kilonser Hun Manet tebu Hun Sen-ia arütsülen aliba Cambodian sepaitem dang taremzüker akatsü ayongzüker aser ceasefire raksatsütsü aser Cambodia-Thailand peace declaration raksatsütsü mechi Thai sepaitemi asenok raratsü atema anir aotsü meranger, ta tai tongloktüsü.

Item rara ya ajanga linük anaprong nungi nüburtem pei ki yutsür tesem balalai jena aoba asendenshir.

Thailand indang Second Army Region ajanga sangdong ka nung ashiba agi, arütsülen tesem balala nungi nisung 35,000 ainshidaksüogo, kasa mapang Cambodia indang Oddar Meanchey provincial administration-ia sangdong ka nung arütsü anasa aliba yimdaklir aika jena aor, ta ashi.

Rara mechi Cambodian province nung Hombarnü school melapokdaksü.

Thailand aser Cambodia tsüngta ali nung arütsü 817 kilometres aliba nung küm noklang ka dak tema mangatettep adoka arur, koba France-i Cambodia ya colony ka ama yimsü asüdang 1907 nung asazüka liasü.

Yimjung yimya nung angatetteptsü merangaka mapang shia arütsülen atsükshia khatempba ataloka arur aser hopta junga artillery amshia khatempba lir.

14 buba Marsosang Football Trophy 2025 meraketa tenzükogo



Trophy tenzuka mezung asayatsupur den Special Guest Imsongmereni salemiyonga aoba mapang

Chuchuyimlang town, Luchii/December 8 (TYO): Nüburtemi yongyaseta ataba Marsosang nüngtem asayaba 14 buba Football Trophy 2025 Hombarnü Nagaland State Lotteries Director, Imsongmeren, NCS-i yangi Langpangkong Tsükong G.H.S Chuchuyimlang Play Ground nung meraketa tenzüksüogo.

Iba asayamung ya Rocky Club, Chuchuyimlang-i kümnabuba nung khen ayongzüka akar. Mokokchung district telungtet nungbo trophy tulutiba rongnung MDFA trophy sülenbo iba ya tanabuba asütsü. Iba trophy shir teloki bendir Champion nem sen 1.5 lakh, Runner-up nema trophy den 1 lakh aser semifinal nung tsüker team ana prongla nem 10,000/- senpettsütsü. Iba den nija senpet - best player, best goalkeeper, best defender, highest goal scorer aser best fair play team shima senpettsütsü, ta tayongertemi metetdaksü.

Taküm iba asayamung nung telok 11-i shilem agitsü arua lir, itemji - Pool 'A' nung, Tongpangsanger Club, Vision Sporting Club aser Pool 'B' nung, Aroju Club, Team Saturday, Morung Boys United FC. Pool 'C' nung - Marsosang Sporting Club, Young Vision aser Merasen lir, aser Pool 'D' nung, United Brothers aser N.

Obang Memorial Football Team na ataja lir.

N. Obang Memorial Football Team-i 12th & 13th Marsosang Football Trophy atong-atonga bena lir. Taküma team tajung tesa adenshia lir ta angazüker, anungji, shibai iba trophy ya abentsüar shingaia meshiteti nüburtem tiyongyaba tulu nung lir. Iba asayamung ya 13th Dec, 2025 nü tembangtsü sentong renema lir.

Imsongmeren-i iba trophy lapokja jembidang, 1994 nungi tenzuka tanü tashi Rocky Club-i iba asayamung kanga junga aser meranga ayonga lanurtem nem sabang lapokja sempet aketertem anitetba asoshi pelaba den ano iba asayamung ya tarutsü nung tensa den sütepa tajungba aser tuluba ayonga aotsü imlar, ta ashi.

Football nung dang masü saka saisabong ajak nung tazüokba (discipline) ya kanga tongtibang, aji melira tejakleni maotsü, anungji, takoker taküm ka akümtsü asoshi saisabong asayaba mapang nung masü saka teti tazüokbaji alitsü tim, ta pai asayartem dak lidaktsünüba o ka ashi. Paisa asayartem dang saisabonger ka ama yimya tajung nung asayaba den tereprangi arurtemia rarabangsen madokdaksüi awashi meteta reprangtsü asoshi ajungshia liasü.

Taruba küm Dr. T. Ao

trophy koba Mokokchung nung asayatsüba lir, iba trophy nungia asayar karbo shimteta shilem agitetsüsa nükla yur merangtsü asoshi paisa ajungshi. Paisa alima den tsüngkang medema aotsü asoshi onük ka lemsatepdang, taoba mapang angazüker aliba meshitakba/menügdakbatem intoktsü aser tanü putui nüngdakba shisa tasentem angazüka liru medema aotsü asoshi paisa ayongzü.

Asayamung tenzuka mezung asaya Pool 'A' nungi Tongpangsanger Club o Vision Sporting Club na asayaba, Vision SC-i goal 5-2 agi, Tongpangsanger madak takok ngua liasü.

Asayamung lapokba sentong nung MDFA Vice President (Technical), B e n d a n g n ü k s h i ; Chiuchuyimlang Riongsanger Tatar Menden nungi yimsüsür Bendanglepden Jamir nadia tepela o den tayongzüka o tulu bener arua lemsatep. Tayonger tenüng nung T. Temsu-i tarur ajak pela-a agizük aser Chuchuyimlang Baptist Arogo Pastor, Rev. T. Lima-i temoatsü meshia sarasademtsü. Iba sentong nung Temsusenla Jamir menden liasü aser Sentimongla-i ken tajung ka tena tesentepertem saksalemdaksü.

Mezüngbuba 35+ MFL Vision League tenzükogo

Dimapur, Luchii/December 8 (TYO): Mokokchung District Football Association tawabangba kübok Longterok Football Club-i teyari agüja 35+ Mokokchung Football League-i ayongzüka mezüngbuba 35+ MFL Vision League; Under-13 football league Mojabile Football Turf, Mokokchung nung tenzükogo.

League lapokba sentong nung Assistant Commissioner, Mokokchung Ajay Moktan, IAS alakteta jaoker liasü, shibai tanurtem nem discipline, teamwork, aser tamakoktem kokteta aotsü angazükdaksütsü atema

saisabong ya kodang tongtibang iba indang lemsatep.

Sentong nung MDFA tatong tir Bendangnukschi-i asayartem dang angazüktsü, renloka aotsü aser parnok indang sempet ya lokti ajangzüktsü atema amshitsü ajungshiba den, iba Vision League ajanga football philosophies tasen ajungmesotsü ta temulung lema bilemba lemsatep.

Kasa mapang nung Senior Superintendent of Police, Vesupra Kezo, NPS-i asayamung nung shilem agirtem dang iba maongka ya takok tashi agitsü, yimiyayimpong azüoka alitsü

aser tamakok anguba mapang tezü madangtsü ajungshiba den asüng football asayartem idaki anitetsü, ta ashi.

Iba sentong ya Er. Imtiyanger Imchen lenisüba nung agi aser Pastor, Christ Church Imliwapang-i sarasadema liasü. Sentong nungsa league Convenor Tiakumzuk-i lokti pela agizükba o jembi.

Ajak senteper iba asayamung nung arishi küm 6 nungi 13 tsüngda alir tanurtemi kümteba team 6-i shilem agidar. Team trok ya 35+ Mokokchung Football League indang team troki achaayangdar.

Son blackmail asüba tetsür ka tepuokdaki yok

Luchii/December 8, 2025 (Agencies): South Korea nung okadak kati nüngtugu football asayar Son Heung-min blackmail asüba atema tetsür ka küm pezü asoshi tepuokdaki yokogo.

Tetsürla (20s) den la nem teyari agütsüsang (40s) na ya taoba mapang Tottenham captain blackmail asüba atema aitsüogo. Lai Son indang tanur bena lir ta shia pa blackmail süa liasü.

Tetsürla yagi Son den taoba küm tongtepratepa lai par chir bena lir ta ashi, ajisüaka lai par chir bena ali mali mejangjai liasü, ta Seoul district court-i ashiba local media sangdong ajanga metetdaksü.

Lai pa ket nungi won million 300 rakzükrakdema agi aser pai tashi mangara yimjak nung metetdaksütsü amokmerena liasü.

Tetsürla yagi iba sen ya luxury aser designer osettem nung entoka liasü, ta AFP news agency-i metetdaksü.

"Tetsürla yagi ashiba agi lai sen ya compensation ka ama agizük aser ken o nung takoksarji la ama sayur," ta obendangeri Hombarnü okadak ashi. "Ajisüaka lai jembiba aser shitakba kecha atalok aji meputeper," ta parnoki ashiba den, iba inyakyim kanga

junga sentong yanglur benoka inyakba atema la aitsü.

Tetsürla nem teyari agütsüsang, shibai sen meshia agitsü atema Son 15 tashi amokmerena liasü, pa-a küm ana tepuokdak ayutsü obendang agütsüogo.

Tena yagi taküm sen timba akhangba sülen Son-i police nem iba osang agüja liasü.

Obendangeri ashiba agi, tetsürla aser la nem teyari agütsüsang yagi Son ya nüngtugu asüba agi iba jenjang agi aser iba ajanga Son kanga timtemdaksüogo.

Son ya October ita Major League Soccer (MLS) nung sen timtiba aazükba football asayartem rongnung tangbuba ta sangdongogo.

Küm 10 asayaba sülen arishi küm 33 tain asayar yagi August ita Tottenham toktsür Los Angeles Football Club nung oa dena liasü.

Son ya Asia nung football asayar tajungtiba ta züngshir aser pa par linük aser temeket nung kanga nüngtugu lir.

2022 küm Spurs nungi asayaba mapang pa ya Premier League's golden boot award anguba Asia nungi mezüngbuba asayar aküm.

ICC-i India team dang match fees shilem 10 senchi achi

Luchii/December 8, 2025 (Agencies): South Africa den Raipur nung tanabuba ODI asayaba mapang slow over-rate atema India team dang match fee shilem 10 senchi chiogo. Iba asaya ya India-i wicket pezü agi makok, aser South Africa-i India den asayaba mapang run timtiba menepba otsü tasen ka yanglua liasü.

Iba sülen tasembuba ODI asayabo India-i wicket teku agi ayong ayonga koka iba asayamung kokogo, ajisüaka International Cricket Council (ICC)-i Hombarnü ashiba agi, India team-i aibelenba parnoki ngutetogo.

"KL Rahul-i aniba team ya atakzükja aliba mapang dang nungi over ana agi menoba ngutetba sülen Emirates ICC Elite Panel of Match Referees nungi Richie Richardson-i iba temerenshi agüja liasü," ta ICC-i metetdaksü.

Rahul ya Shubman Gill melena iba asayamung atema captain asütsü shima liasü. "Anungji India team dang ICC Code of Conduct for Players and Player Support Personnel kübok Article 2.22, koba minimum over-rate offences dak sendaka lir iba dak ajemdaker merenshiogo.

"Asayartem mapang

atazkükja aliba mapang montetba over shia atema parnok indang match fees shilem pongu senchi chiogo. Stand-in skipper ama KL Rahul-i aibelenba nangzükogo aser temerenshi agütsüba agizükogo, anungji ken o angadangtsü nüngdak madoker," ta ICC sangdong ajangasa metetdaksü.

Tanabuba ODI asaya nung Virat Kohli aser Ruturaj Gaikwad nati century kaka yangluba sülen India team-i asayar 5 out sür run 358 yanglu. Ajisüaka opener Aiden Markram-i ball 98 nung run 110 yanglua South Africa team jenjang kanga junga yanglutsü aser Dewald Brevis aser Matthew Breetzke natia half-century yanglua team nem teyari agütsü. Iba sülen Corbin Bosch aser Keshav Maharaj nati team takok dangi ania liasü. South Africa team-i iba asaya ya ball pezü anunga lia wicket pezü agi akok.

Mezübuba ODI nung run 350 arishiba tera agi dang memenebpa sülen tanabuba asayabo parnoki koka liasü. Ajisüaka tasembuba ODI asayabo India-i amokbanger asaya-a South Africa nem run 270 dang yangludaktsü aser iba run ya over 10 dak tema anunga lia menepa liasü.

BILEMDANGANG

"Tamakok aika ajurutsü, saka iba nem na tekokdaksü."